



Inuit Ataqatigiit Inatsisartuni

13. januar 2009

Inatsisartut suleriaasianni § 36 immikkoortoq 1 naapertorlugu matumuuna imaattunik Naalakkersuisunut apeqquteqarpunga:

(Inatsisartuni ilaasortaq Debora Kleist, Inuit Ataqatigiit)

Apeqqutit:

1. Inuusuttut inersimasullu innarluutillit immikkut ittumik atuartinneqartarnerat siunissami pitsaaneruseqarpat? Inuit Ataqatigiit immikkut ittumik ingerlalersinnaaqqullugu Naalakkersuisut qanoq pilersaaruteqarpat?
2. Inuusuttut meeqqat atuarfiannik naammassinnereernerminni inuusuttut ilinniaqarfiini allani malinnaasinnaangitsut ukiuni pingasuni arlaqartuniluunniit ilinniakkamik ingerlatsisinnaannissamut inatsisitigut pisinnaatinneqalernissaat qulakkeerniarlugu Naalakkersuisut qanoq pilersaaruteqarpat?
3. Inersimasut inuusuttullu timikkut tarnikkulluunniit pisinnaasakinnerusut immikkut ittumik atuartinneqarsinnaaneratt allatigullu sapinngisamik inuuffigisaannut qanittumi immikkuullarissamik pædagogiskiusumik ikiorserneqarsinnaanerannut Naalakkersuisut qanoq iliuuseqalersaarpat?
4. Inatsisitigut periarfissaqarluaraluartoq innarluutilippassuit ilaqutaallu siusinaartumik soraarnerussutisiaqalersarput imaluunniit atuartinneqaratik, ilinniartinneqaratik sulisinneqaratillu. Kommunalbestyrelsi immikkut ittumik atuartitsinermut neqeroruteqarnissamut pisussaaffeqarnerata erseqqissaavigineqarnissaanut Naalakkersuisut qanoq iliuuseqarnialersaarpat, qanorlu inuit taakkua pineqartut immikkut ittumik atuartinneqarnissaminnut qinnuteqarpata taava kommunimi aningaasaqarneq pissutigalugu itigartinneqannginnissaat kinguartinneqannginnissaallu qulakkeerneqassava.
5. Ilulissani specialcenterimut qinnuteqartut utoqqaanerit atugaasa pitsanngorsaa-vingineqarnissaannut qulakkeerisussamik Naalakkersuisut qanoq pilersaaruteqarpat?

Tunngavilersuut:

Piffissami kingulliunerusumi inuiaqatigiinni tusagassiutinilu Ilulissani specialcenterimut qinnuteqartartut utoqqaanerit atugaat pillugit oqallittoqarpoq. Oqallinneq soqutiginarluinnarpoq isumagalu naapertorlugu malitseqartariaqarluni.

Ilulissani immikkut qitiusumik atuartitsivimmi, specialcenterimi, sullinneqartartut ilaat tarnimikkut innarluuteqartuupput, atuartut ilaat annertuumik sumiginnagaasimanerup kingunerisaanik atuarfeqarfimmi atuartitaanermik nalinginnaasumik atuarsinnaasimannginamik tassani atuartinneqarnissamik neqeroorfigineqartartut. Tassunga innersuunneqartarput specialcenterimi inuttut ineriartornissamut pitsaanerusunik neqeroorutissaqarnera pissutigalugu.

Meeqqat atuarfiat pillugu inatsisitoq naapertorlugu atuartut 20-liinissamik tungaannut atuartinneqarsinnaasimapput, atuartussaataanermik sivitsuisinnaaneq taanna atuarfik pillugu inatsimmi nutaami atuutinngilaq, tassani ukiuni qulini atuartussaataitsisoqarmat, tamatuma kingorna ass. inuusuttunik innarluutilinnik atuartitsineq, sulitinneqarnerat, sammisaqartinneqarnerat il.il. inatsit alla naapertorlugu pisarlutik. Taamaattumik meeqqat atuarfiata kingorna taakkua inatsit allat atorlugit isumagineqartussaapput, soorlu sunngiffimmi atuartitsinermut, piginnaanngorsaaqqinnermut, innarluutilinnut meeqqanullu, siusinaartumik soraarnerussutisialinnut il.il. inatsit, sulili inersimasunut inuusuttunullu timikkut tarnikkullu innarluutilinnut immikkut atuartitsinermut ataatsimoortumik ataqatigiissumik inatsiseqanngilaq.

Taamaattumik isumaqarpunga piffissami aggersumi soorlu Danmarkimi inatsisinut naapertuuttumik immikkut inatsisiliunneqartariaqartut. Danmarkimi ilaatigut Inatsiseqarpoq inersimasunut immikkut ittumik atuartitsinermut tunngasoq nr. 866 7/11 1995-meersoq kingornalu allanngortinneqarsimasoq, kiisalu Inatsit nr. 564 6/6 2007-meersoq inuusuttunut immikkut pisariaqartitsisunut inuusuttullu ilinniarfiini ilinniartinneqartunut tunngasoq.

Nalunaarusiami taaguutilimmi: Innarluutillit atuartitaanissamut, ilinniartitaanissamut sulif-
feqarnissamullu ullumikkut periarfissaat tamakkunungalu aporfissat" aprilimi 2009-mi taamani
Ilaqutariinnermut Peqqissutsimullu kiisalu Kultureqarnermut, Ilinniartitaanermut, Ilisima-
tusarnermut Ilageeqarnermullu Naalackersuisoqarfiusunit saqqummiunneqartumit ilaatigut ima
inerniliisoqarpoq:

Inatsisitigut periarfissaqarluartoq innarluutilippassuit ilaqaallu siusinaartumik soraar-
nerussutisiaqalernissamut innersuunneqakkajuttarput, imaluunniit atuartinneqaratik, ilinniar-
tinneqaratik sulitinneqaratillu. Tamanna arlalinnik pissuteqarsinnaavoq:

1) Inatsisinut taakkulu aqutigalugit periarfissanut ilisimasaqannginneq

- 2) Tapersortinik isumaginninnikkut perorsaanermik ilinniarsimasunik, suliamik ilinniagalinnik inunnillu suliassaqarfimmik immikkut ilisimasalinnik amigaateqarneq
- 3) **Kommunit ataasiakkaanit innarluutilinnut neqerooruteqannginneq – suliassaqarfimmik tunulliussinermik pissuteqakkajuttartoq**
- 4) Innarluutillit assigiinngitsorpassuit siammasippallaarnerat
- 5) Innarluutillit pillugit inuiaqatigiinni nalinginnaasumik ilisimasaqannginneq

Taamaattumik erseqqippoq innarluutillit atuartinneqarnissaminnut, ilinniagaqarnissaminnut suliffeqarnissaminnullu inatsisitigut neqeroorfigineqarnerat erseqqissaavigineqartariaqartoq. Tamatuma saniatigut aammattaaq inuusuttut meeqqat atuarfianniit anereernermi kingorna inuusuttut ilinniaqqiffiiniissinnaanngitsut eqqarsaatigalugit, Kommunalbestyrelsip immikkut ittumik atuartitsinermut neqerooruteqarnissamut pisussaaffeqarnerata inatsimmi atuuttumi erseqqissaavigineqarnissaanut pisariaqartitsisoqarpoq. Tamatuma saniatigut aammattaaq pisariaqartinneqarpoq qulakkiissallugu kommunimi aningaasaqarneq pissutigalugu pineqartunit immikkut ittumik atuartinneqarnissamut qinnuteqaatit itigartinneqarsinnaanatillu kinguartinneqarsinnaannginnerat.

Kingullermut tunngatillugu pissutigaaara ernummassutigisinnaagakku kommunit sipaarniarneranni eqqugaanissaat, tassa Ilulissani specialcenterimi meeqqat inuusuttullu atuartinneqartut amerlaasuut kommunit akilerneqartarmata. Tamattami nalunngilarput kommunit aningaasaqarniarnerat ilungersunartuusoq kommunimiillu kommunimut aningaasaqarneq allanngorarsinnaasaqisoq, taamaattumillu taamaattoqarnerani kommunit ilaasa manna pineqartoq pingaarnersiunerminni sipaarniarfigisinnaagaat annilaanngatigisinnaavara.